

«ՔԱՂԱՔԱԿԱՆ ՄՇԱԿՈՒՅԹԻ ԵՎ ՀԱՄԱԶԱՅՆՈՒԹՅՈՒՆՆԵՐԻ
ԶԱՐԳԱՑՄԱՆ «ՇԻՐԱԿ ԿԵՆՏՐՈՆ» ՀԿ

ՀՀ, 3104 Գյումրի, Վարպետաց 176, 301
հեռ. +(374 312) 6-69-92, +(374 91) 45-13-37
Էլ փոստ՝ info@shirakcentre.org
Կայք՝ www.shirakcentre.org

Շիրակի մարզպետ Ա. Գիզիրյանին

Դիմում - առաջարկ

Պետության կողմից բնակարանային փոխհատուցման ոչ ենթակա անօթևան ընտանիքներին կացարան հատկացնելու խնդրի մասին

Աղետի գոտում և հատկապես Գյումրիում կան պետության կողմից բնակարանային փոխհատուցման ոչ ենթակա բազմաթիվ ընտանիքներ, որոնք չունեն նույնիսկ ժամանակավոր կացարաններ և բնակվում են վարձով կամ ազգ-բարեկամների տանը:

Տասնյակ ընտանիքներ էլ կան, որոնք թեև երկրաշարժին կորցրել են բնակարաններ, սակայն անօթևանների հերթացուցակում ընդգրկված չեն միայն այն պատճառով, որ վերահաշվառման ժամանակ՝ մինչև 2008 թվականի ավարտը հանրապետությունից բացակայել են կամ ժամանակին չեն կարողացել անհրաժեշտ փաստաթղթերի փաթեթը պատրաստել ու հանձնել համայնքային իշխանություններին: Ինչպես գիտենք, նրանք ևս, աղետի գոտում բնակբաշխման գործընթացը կանոնակարգող ՀՀ կառավարության որոշումներով սահմանված կանոնակարգի համաձայն, ենթակա չեն պետության կողմից բնակարանային փոխհատուցման:

Այդ իսկ պատճառով մեր բազմաթիվ հայրենակիցներ, հատկապես՝ վերջին 2-3 տարվա ընթացքում արտերկրից վերադարձած ընտանիքները, հայտնվել են անելանելի վիճակում:

Մեզ են դիմում և այնպիսի անօթևաններ, որոնք կացարան չունենալու պատճառով զրկված են անգամ մշտական կամ փաստացի բնակության վայրի հաշվառում ունենալու հնարավորությունից (<http://shirakcentre.org/hy/lurer/989-shirak-centre-ngo>, http://www.youtube.com/watch?v=iyRs0ec62Es&feature=player_embedded#at=14):

Պարոն մարզպետ

Կարծում ենք՝ ներկայումս, երբ Հայաստանում և հատկապես աղետի գոտում մեծ են արտագաղթի ծավալները, անհրաժեշտ է անհապաղ անդրադառնալ փաստացի

փողոցում և ծայրահեղ ծանր սոցիալ-տնտեսական վիճակում հայտնված մեր համաքաղաքացիներին մշտական կամ ժամանակավոր կացարաններով ապահովելու խնդրին: Նրանցից շատերը համաձայն են անգամ բնակվել ժամանակավոր կացարաններում կամ հանրակացարաններում, միայն թե ծածկ ունենան իրենց գլխի վերև և որևէ տեղ փաստացի հաշվառվելու հնարավորություն:

Մենք տեղյակ ենք, որ Գյումրին տնակներից ազատելու խնդիրը Ձեր կողմից շատ է կարևորվում: Իսկ աղետի գոտում քաղաքացիներին բնակարաններ հատկացնելու կարգը սահմանող ՀՀ կառավարության որոշումների համաձայն էլ բնակարան ստացած քաղաքացիները, բացառությամբ բազմանդամ ընտանիքների, պարտադիր կերպով պետք է քանդեն և տարածքներն ազատեն ժամանակավոր կացարաններից: Այդ թվում կան քանդման ենթակա, նախորդ և ընթացիկ տարում բնակարաններ ստացած ընտանիքների կողմից տնօրինվող քարաշեն կամ կիսաքարաշեն ժամանակավոր կացարաններ, որոնք միանգամայն պիտանի են երկարաժամկետ բնակության համար: Ուստի նպատակահարմար կլինի, եթե նման ժամանակավոր կացարանները քանդելու փոխարեն համապատասխան դրամական փոխհատուցում տրամադրվի դրանք փաստացի տնօրինողներին և կացարանները տրամադրվեն այն ընտանիքներին, որոնք բնակվելու որևէ տեղ չունեն և պետության կողմից էլ բնակարանային փոխհատուցման ենթակա չեն:

Այդ նպատակով առաջարկում ենք աղետի գոտում ստեղծել հանձնաժողով, ընդգրկելով նաև քաղաքացիական հասարակության կառույցների ներկայացուցիչներ: Այդ հանձնաժողովին տալ բնակության համար պիտանի, քաղաքաշինության նորմերին չխանգարող ժամանակավոր կացարանները բնակարան ստացած քաղաքացիներից որոշակի գումարային փոխհատուցմամբ վերցնելու, հաշվառելու և վերը նշած կարգավիճակում հայտնված ընտանիքներին բաշխելու լիազորություններ:

Միաժամանակ կարծում ենք՝ անհրաժեշտ է մշակել և իրականացնել պետության կողմից փոխհատուցման ոչ ենթակա ընտանիքներին կացարաններով ապահովելու այլ ծրագրեր ևս: Մասնավորապես.

1. խրախուսել, որ անհատ բարերարների կամ բարեգործական հիմնադրամների կողմից բնակարանների նվիրատվություններ իրականացվեն հատկապես վերը նշված կարգավիճակում հայտնված անօթևան ընտանիքներին,

2. համայնքին պատկանող բնակարանային ֆոնդից կատարվեն հատկացումներ,

3. հատկացումներ կատարվեն նաև Հայաստանում պետական բյուջեի միջոցներով կառուցված սոցիալական բնակարանային ֆոնդից:

«Շիրակ կենտրոն» ՀԿ նախագահ՝ Վահան Թումասյան

Գյումրի

04 հուլիսի 2011 թ.



**Հ Ա Յ Ա Ս Տ Ա Ն Ի Հ Ա Ն Բ Ա Պ Ե Տ Ո Ւ Թ Յ Ա Ն
Շ Ի Բ Ա Կ Ի Մ Ա Բ Ջ Պ Ե Տ Ի Տ Ե Ղ Ա Կ Ա Լ**

« 20 » 07 2011թ.

ք. Գյումրի, Գ. Նեղինի 16

N: 3428-71

հեռ. (0312) 3-27-95, ֆաքս (0312) 3-50-77

«ՇԻՐԱԿ ԿԵՆՏՐՈՆ» ՀԿ

ՆԱԽԱԳԱՀ ՎԱՀԱՆ ԹՈՒՄԱՍՅԱՆԻՆ

Ի պատասխան ՀՀ Շիրակի մարզպետին ուղղված Ձեր 08.07.2011թ. թիվ A8FA-362E-3835 գրության հայտնում ենք, որ ՀՀ Շիրակի մարզում 2011-2013թթ. ընթացքում պետական միջոցների հաշվին իրականացվում է միայն երկրաշարժի հետևանքով անօթևան մնացած ընտանիքների բնակարանային ապահովման ծրագիր:

ՀՀ կառավարության 1999թ. հունիսի 10-ի թիվ 432 որոշման մեջ լրացումներ և փոփոխություններ կատարելու մասին 2009 թվականի նոյեմբերի 26-ի N 1402-Ն որոշմամբ հաստատված կարգի 6-րդ կետի համաձայն՝ կառուցված բազմաբնակարան շենքերի բնակարանների հատկացումից հետո մեկամսյա ժամկետում՝ բնակարան ստացող քաղաքացիների և նրանց ընտանիքների անդամների կողմից բնակությունից ազատված ոչ հիմնական շինությունները ենթակա են քանդման՝ կառուցապատողի կամ համապատասխան համայնքի ղեկավարի կողմից:

ՀՀ պետական բյուջեի միջոցներով ՀՀ աշխատանքի և սոցիալական հարցերի նախարարության կողմից սոցիալական ծանր պայմաններում գտնվող և բնակարանային պայմանների բարելավման կարիք ունեցող ընտանիքների համար Մարալիկ քաղաքում իրականացվում է սոցիալական բնակարանների շինարարություն, որտեղ որպես շահառու կարող են ընդգրկվել նաև ոչ երկրաշարժի հետևանքով անօթևան մնացած ընտանիքներ:

Գյումրու քաղաքապետարանի կողմից համայնքային սեփականություն համարվող բնակարանային ֆոնդից ազատված բնակարանները պարբերաբար տրամադրվում են Գյումրի քաղաքում երկրաշարժից ոչ անօթևան, սոցիալական ծանր վիճակում գտնվող և բնակարանային պայմանների բարելավման կարիք ունեցող ընտանիքներին:

Տեղեկացնում ենք նաև, որ ՀՀ Շիրակի մարզպետարանի կողմից համապատասխան առաջարկություններ են ներկայացվել բարեգործական հիմնադրամներին և անհատ բարերաներին Գյումրի քաղաքում երկրաշարժից ոչ անօթևան, սոցիալական ծանր վիճակում գտնվող և բնակարանային պայմանների բարելավման կարիք ունեցող ընտանիքներին հնարավորության սահմաններում աջակցելու համար:

Ոչ երկրաշարժի հետևանքով անօթևան մնացած ընտանիքների բնակարանային ապահովման հարցը կքննարկվի հետագայում՝ երկրաշարժի հետևանքով անօթևան մնացած ընտանիքների բնակարանային ապահովման ծրագրի ավարտից հետո, համապատասխան պետական ծրագրի իրականացման ժամանակ:

Հարգանքով՝



Ս. ՊԵՏՐՈՍՅԱՆ

Կատարող՝ Ա.Մարգարյան
Տ.Հարությունյան
Հեռ. 0312 3-55-39